

**AWIG – AWIG
DESA ADAT TUNON**

CECIREN DESA ADAT TUNON

Ceciren (lambang) Desa Adat Tunon medasar antuk warna putih susu (maka cihna medasar antuk kasucian). Masengker antuk Padma Nglayang. Ring Sajroning padma madaging gambar malih kutus soroh. Maka sami dados sia soroh, duaning angka 9 (sia) pinaka angka sane pinih ageng. Soang-soang gambar macaciri sekadi ring sor :

- 1 Padma Nglayang (Sekar Tunjung Kutus Bidang = Astha-Dala) : Warnannyane biru langit, pinaka tatujon mangda Desa Adat Tunon lan Jagat Rayane suci nirmala, tentrem kerta raharja.
- 2 Bunderan magaris tigang siki : Warnannyane bang asik, ireng asiki, lan poleng (brumbun) asiki pinaka ceciren Kahyangan Tiga sane kasungsung olih Krama Desa Adat Tunon, taler duanin sahana maurip kabanda antuk utpatti, sthiti, lan pralina.
- 3 Garis mabucu lima (segi lima) : Ngangge warna bang (barak), caciren Panca Sila sane kamanggehin dados dasar/pamikukuh Desa Adat Tunon.
- 4 Swastika lan Sunarnyane : Ngangge warna kuning emas, pinaka ceciren Moksartam Jagadhita (kasukertaan jiwa lan raga) sane patut kaulati olih Krama Desa Adat Tunon lan sang negegang Agama Hindu.
- 5 Meru, Anak Muspa Sareng Kalih Lanang Wadon lan Pelatarannyane : Ngangge warna soang-soang meru ireng, anak muspa mabusana putih kuning, lan pelatarannyane putih susu, pinaka ceciren Tri Hita Karana sane kemanggehang dados dasar/pamikukuh pawangunan ring Desa Adat Tunon.
- 6 Candi Bentar : Ngangge warna barak, pinaka ceciren Seni Budaya Bali, riantukan akwehan pangupajiwan krama Desa Adat Tunon dados undagi/tukang gambar, ukir, lan pasangan still Bali.

- 7 Padi lan Kapas : Padi warnanyane kuning lan kapas putih. Pinaka ceciren Jagadhita (kemakmuran), gemuh ripah lohjinawe sane kaulati ring krama Desa Adat Tunon.
- 8 Selempang (Pita) : Ngangge warna dasar putih, ring sajroning selempang masurat aksara Bali ngangge warna ireng masuara “Salunglung Sabhayantaka” mapiteges Ala Ayu Kasinarengan (Gotong Royong), pinaka ceciren paingkupan iket-iketan pakulawargan Krama Desa Adat Tunon.
- 9 Telaga Medaging Angsa : Tepin telagane ngangge warna ireng, toyan telagane biru, angsa petak, pinaka ceciren mangda saparilaksana Krama Desa Adat Tunon nyejeran kasucian lan kawicaksanaan.

Ring sor utawi dasar bucu lima (segi lima) madaging kotak ngangge warna dasar putih kasurat aksara warna kuning emas masuara “Desa Adat Tunon” , pinaka aran Desa Adat puniki.

PIDAGING MAKA BANTANG AWIG-AWIG DESA ADAT TUNON

SARGA

WANTANG

	CECIREN DESA ADAT TUNON.....	i
	PIDAGING AWIG-AWIG DESA ADAT TUNON.....	1
I	ARAN LAN WAWIDANGAN DESA.....	1
II	PATITIS LAN PAMIKUKUH.....	1
III	SUKERTA TATA PAKRAMAN.....	2
	Palet 1 Indik Krama	2
	Palet 2 Indik Prajuru Desa.....	4
	Palet 3 Indik Kulkul.....	6
	Palet 4 Indik Paruman.....	7
	Palet 5 Indik Druwen Desa.....	8
	Palet 6 Indik Sukerta Pamitegep.....	9
	Kaping 1 Karang, Tegal lan Carik.....	9
	Kaping 2 Pepayonan.....	11
	Kaping 3 Wewangunan.....	12
	Kaping 4 Wewalungan.....	13
	Kaping 5 B h a ya.....	13
	Kaping 6 Panyanggran Banjar	14
IV	SUKERTA TATA AGAMA.....	15
	Palet 1 Indik Dewa Yadnya.....	15
	Palet 2 Indik Rsi Yadnya.....	19
	Palet 3 Indik Pitra Yadnya.....	19
	Palet 4 Indik Manusa Yadnya.....	24
	Palet 5 Indik Bhuta Yadnya.....	24
V	SUKERTA TATA PAWONGAN.....	26
	Palet 1 Indik Pawiwahan.....	26
	Palet 2 Indik Nyapian.....	28
	Palet 3 Indik Sentana.....	29
	Palet 4 Indik Warisan.....	31
VI	WICARA LAN PAMIDANDA.....	33
	Palet 1 Indik Wicara.....	33
	Palet 2 Indik Pamidanda.....	33
VII	NGUWAH NGUWIHIN AWIG-AWIG.....	35
VIII	PAMUPUT.....	35

MURDHA CITTA

AUM, OM

Om Swastyastu, Om awighnamastu nama sidham,
Putusing Saba Krama Desa Adat Tunon, gumawe Awig-awig Desa Pakraman maka sepat siku-siku pamatut, wastu kasidhan Prayojanan mami kabeh prasama angidep mwah amagehaken kadi linging Awig-awig iki.

SARGA I

ARAN LAN WEWIDANGAN DESA

Pawos 1

- 1 Desa Adat puniki mewasta Desa Adat Tunon.
- 2 Jebar kakuwub wawidangannyane, mawastes nyatur :
 - a Sisih lor ring wawidangan Desa Adat Demayu.
 - b Sisih wetan ring wawidangan Subak Abiantiying.
 - c Sisih kidul ring wawidangan Desa Adat Samu.
 - d Sisih kulon ring wawidangan Desa Adat Bindu Mambal.
- 3 Desa Adat puniki kawangun antuk karang ayahan Desa lan karang guna kaya, munjuk lungsur saking 119 (satus siangolas) karang.

SARGA II

PATITIS LAN PAMIKUKUH

Pawos 2

1. Desa Adat Tunon ngamanggehang pamikukuh/dasar, minakadi :
 - a Pancasila
 - b Undang-Undang Dasar 1945 (pamekas pasal 18)
 - c Perda Provinsi Daerah Tingkat I Bali, Nomor 6 Tahun 1986.
 - d Tri Hita Karana, amnut sadacara Agama Hindu.

Pawos 3

2. Mungguwing patitis Desa Adat Tunon inggih punika :
 - a Mikukuhin miwah ngrajegang Sang Hyang Agama.
 - b Nginggilang tata prawertine maagama.
 - c Ngrajegang kasukertaan Desa saha pawongannyane sakala lan niskala.

SARGA III
SUKERTA TATA PAKRAMAN
Palet 1
Indik Krama

Pawos 4

1. Sane kabawos Krama Desa, inggih punika :
 - a. Kulawarga sane maagama Hindu, saha ngamong karang Desa utawi karang guna kaya.
 - b. Kulawarga maagama Hindu sane jumenek ring wawengkon Desa Adat Tunon saha lila makrama.
2. Sajaba punika sinanggeh tamyu.

Pawos 5

Krama Desa wenten 7 (pitung) paos, lwire :

1. Krama Pengarep, krama sane ngamong karang ayahan Desa utawi karang guna kaya (satunggil lawang)
2. Krama Pengampel/Pangele, krama sane kakuubang olih krama ngarep.
3. Krama Balu, inggih punika krama pengarep sane katinggalin seda olih lanang wiyadin istrinyanne utawi sangkaning nyapian.
4. Krama Ngalentik, inggih punika krama pangele sane katinggalin seda olih lanang/istrinyanne utawi sangkaning nyapian.
5. Krama Tapukan, krama sane nenten medrebe rerama luh muah wani tur dereng antes ngayah (durung mayusa 17 warsa utawi selami kantun masekolah, kailitika pastika saking sekolahanane).
6. Krama Roban, warga sane teruna teruni, wiadin para ali-alit utawi krama tiosan sane kaundul olih sinalih tunggil krama Desa Adat.
7. Krama Kawuban, krama pangele utawi deha taruna sane magenah ring dura Desa nanging kantun kaundulang olih krama Desa Adat.

Pawos 6

Kawit tedun dados krama Desa wenten tigang paos lwire :

- a. Wit ngamong karang ayahan Desa utawi karang guna kaya.
- b. Wit marabian/pawiwahan.

- c. Wit saking jumenek mapaumahan saha lila makrama wiadin ngarereh pangupajiwa sajeroning palemahan Desa Adat Tunon tur risampun polih wewanengan a sasih ri sampun kaupeksa olih Prajuru.

Pawos 7

Panumayan tedun makrama nyabran sasih kasanga, nanging keni tetagenan (urunan) masasengker sekadi ring sor :

- a. Krama pengarep/panyelediyi ngelantur pramangkin.
- b. Pangampel/pangele polih sengker a sasih.
- c. Tamiu sane maagama Hindu saha lila makrama, sesampune masengker a sasih dados makrama sepatute, nanging keni gaguat : beras lan kelapa manut pararem saha mapajati ring Pura Bale Agung.

Pawos 8

1. Sahanan krama Desa keni tetagenan (ayah-ayahan muah pedagingan) manut kadi ring sor puniki :
 - a. Ayah pengarep, keni ayahan miwah urunan mamungkul.
 - b. Ayah pengampel, keni ayahan manut pararem, urunan saparo sakeng krama ngarep.
 - c. Ayah balu, keni ayahan asibak manut kahanan, urunan mamungkul.
 - d. Ayah ngalantik, keni ayahan manut pararem, tan keni urunan, nanging yanin ayah ngalantik tulak wali mawuwuh keni urunan seprapat sakeng krama ngarep.
 - e. Ayah tapukan, tan keni ayahan, urunan mamungkul.
2. Prade rikalaning ngayah wenten sinalih tunggil krama matilar sadereng puput karya, paruman wiadin sapanunggilannya (tan pasadok) wenang krama inucap keni pamidanda manut pararem, tanjek laler kawastanin.

Pawos 9

Krama Desa kadadosang :

- a. Mapuangkid utawi tan tedun :
 1. Rikala pawangunan, mayadnya, matepetin, manut pararem.
 2. Dados wantah apisan sajawaning wenten wakan sakeng Prajuru Desa.
- b. Nyada mapiteges risampun mayusa 50-70 warsa, patut magentos ayah tur tan dados nyuksukin.

- c Nyade utawi nyuksukin, mapiteges sane kawenangang nyuksukin risampun mayusa 17 warsa (deha taruna), utawi sampun alaki rabi tur mrasidayang nganutin krama.
- d Dosa ayah, kadadosang wantah ping kalih, langkungan ring punika katikelang.
- e Naub sangkaning magenah ring dura Desa (sajabaning pengarep) manut pararem.

Pawos 10

Wusan dados krama Desa, lwire :

- a. Sangkaning :
 - 1. Pinunas ngraga, utawi kesah ka dura Desa.
 - 2. Kanorayang, duaning sampun tan prasida ngehehin solah maprawreti satata mamurung awig-awig.
 - 3. Sampun tan maagama Hindu malih.
- b. Sang wusan mekrama :
 - 1. Patut ngaturang karang ayahan ka Desa (sajaba karang guna kaya).
 - 2. Tan polih pah-pahan sangkaning padruweyan Desa.
 - 3. Pasuk wetu makrama patut atur supeksa ring Prajuru Desa tur keni pananjang batu, yaning sampun seda keni pamelin setra, manut pararem.
 - 4. Sang mamurung patut kandanda manut pararem.

Palet 2

Indik Prajuru

Pawos 11

- 1. Desa Adat Tunon kaenter olih Bendesa Adat.
- 2. Banjar utawi tempekan kaenter olih Kelian Banjar /Tempek.
- 3. Bendesa Adat lan Kelian Banjar /Tempek, patut :
 - a. Mawiwit saking krama wed.
 - b. Kaadegang malarapan antuk gilihan/kacatri ring paruman nyabran 5 warsa, sawawaning wenten parindikan tios, tur dados kagilih malih.
 - c. Maduluran Dewa saksi ring Pura Bale Agung.

Pawos 12

- 1. Bendesa Adat kasangga oilih :
 - a. Patajuh utawi pangliman pinaka panyadennya.

- b. Panyarikan pinaka juru surat.
 - c. Panengen pinaka pangemong druwen Desa.
 - d. Kasinoman pinaka juru arah.
 - e. Saya/Sinoman Prantenan pinaka juru rateng rikala karya agung utawi piodalan ring kahyangan.
 - f. Panyangga Desa pinaka panyangga Prajuru.
2. Kasinoman akehnyane 4 (petang) diri sha magilir nyabran a sasih.
 3. Saya /Sinoman prantenan akehnyane lan kagilir manut kawigunan tur manut pararem.
 4. Sajeroning ngenterang kasukertan niskala, Bendesa patut mingsinggihang Pamangku Kahyangan Desa utawi sang rumaga Sulinggih.

Pawos 13

1. Swadharmaning Bendesa Adat, lwire :
 - a. Ngenterang sahanan pamargin sadaging Awig-awig miwah pararem Desa.
 - b. Nuntun tur ngenterang krama rawuhing warga Desa ngupadi manut patitis.
 - c. Mawosin miwah niwakang pamutus arep ring wicara warga Desa.
 - d. Maka duta Desa matemuang bawos ring sapa sira ugi.
2. Prade Prajuru iwang pangelaksana, keni pamidanda nikel ring kaiwangan soang-soang krama, saha dados kararianang manut pararem.

Pawos 14

Patias utawi olih-olihan Prajuru Desa, lwire :

- a. Luput rarampen (papeson).
- b. Polih tanding tengah.
- c. Patias sewosan manut pararem.

Pawos 15

1. Prajuru Desa kagentosin, riantukan :
 - a. Seda
 - b. Kanoroyang, dwaning iwang pamargi utawi nilar sesana.
 - c. Wit saking kayun rahayu, pinunas ngraga.
2. Nganoroyang utawi ngentosin Prajuru Desa, patut sajeronng paruman, tur kaingkupin olih krama Desa.

Palet 3
Indik Kulkul

Pawos 16

1. Kulkul ring Desa, lwire :
 - a. Kulkul Desa.
 - b. Kulkul Banjar /Tempekan.
 - c. Kulkul Seka-sekaan.
2. Tabuh tatepakan kulkul Desa/Banjar , sekadi ring sor :
 - a. Utpeti
Embas putra : 7 (pitung klentungan)
 - b. Stiti
 - 1) Bhaya :
 - Gni bhaya, a tulud bulus ngelantur banban.
 - Kapandungan, 2 (kalih) tulud bulus.
 - Kaicalan, a tulud bulus.
 - Parabian/ngrorod, a tulud bulus raris banban 3 (tigang) klentungan.
 - Ngamuk, 3 (tigang) tulud bulus.
 - 2) Tedun makarya, 2 (kalih) tulud banban.
 - 3) Ngawendayang makarya, 3 (tigang) klentungan ngempag ping 3 tigang tulud).
 - 4) Rikala puja wali, surya gra, wulan kapangan, nungtit (kulkul bedil).
 - c. Pralina
Kalayu sekaran (seda), 11 (solas) klentungan banban.

Pawos 17

1. Kulkul Desa/ Banjar tan kawenang katepak yaning tan sangkaning pituduh Prajuru Desa/Banjar , sajawaning tengeran bhaya.
2. Sang nepak tan sangkaning pituduh Prajuru Desa, patut digelis atur supeksa maka buatan panepake, yan tan asapunika, wenang sang mamurug kadanda manut pararem.

3. Kulkul seka-sekaan samaliha kulkul pondokan, tan kalugra nyawerin (matehin) sukat utawi tengeran kulkul Desa/Banjar , sajawaning tengeran bhaya, prade mamurug, wenang kadanda manut pararem.
4. Tengeran bhaya Banjar sewosan patut kasawurin.
5. Tengeran bhaya wenang katedunin lih krama Desa wiadin Banjar matulung saha makta gagawan (perabotan) manut tatenger suaran kulkul.

Palet 4

Indik Paruman

Pawos 18

1. Paruman/sangkepan, lwire :
 - a. Paruman Desa/Banjar , kawentenang :
 - 1) Nyabran a sasih, tan paarah-arang duaning sampun tetep panumaya ring rahina Redite Umanis.
 - 2) Napkala (padgata kala) maka jalaran arah-arang manut tatujon.
 - b. Sangkepan Prajuru Desa, kawentenang manut wiguna.
 - c. Paruman seka-sekaan manut pabuat.
2. Paruman Desa/Banjar madudonan sakadi ring sor :
 - a. Prasida lumaksana risampun katedunin olih sang patut ngamiletin, kamanggala antuk tengeran kulkul, miwah mabusana Adat madia, saha tan kalugra makta gagawan sakalwire.
Tan maren mangarcana ring Ida Bhagawan Panyarikan, maka sarana widi widana cane.
 - b. Maka sarana janggi, pangawit kalaksanayang panyacak sep-sepan, saha riwusannya nyacak dadosan gung/alit manut pararem.
 - c. Tan kalugra ngawetuang suara gora utawi byota, yaning wenten asapunika keni pamidanda beya pacamil kadi dandaning nguman-uman ring sabha.
 - d. Pamutus paruman gilik saguluk, prade tan prasida, suara sane makehan kasinanggeh pamutus.
3. Prade pidaging paruman tan kaingkupin, mangda Prajuru Desa ngilikang bebawos, saha pamutusnyane mangda kararemin olih krama Desa, bilih tan prasida kasungkemin jantos ping 3, Prajuru Desa wonang nunas bawos ring sang Ngawa Wenang.

Pawos 19

1. Sajroning paruman Desa, Bendesa Adat patut nyobyahang pamargin ngenterang Desa pamekas nganinin indik :
 - a. Munjuk lungsuring pakraman saha ayah-ayah, sulur arta brana druwen Desa.
 - b. Pidabdab Prajuru nganinin usaha Desa kapungkur.
2. Pamutus paruman Desa, sinanggeh pararem maka pamitegep daging Awig-awig.

Pawos 20

1. Sangkepan Prajuru Desa kawenang wantah ngarincikan pidabdab usaha Desa kapungkur.
2. Sangkepan Prajuru Desa, tan kawenang ngawedalang tatagenan ring krama, sadereng kaingkupin olih krama Desa.
3. Pamutus sangkepan Prajuru Desa, ngawetuang pasuara, maka pidaging pituduh Sang Ngawa Wenang utawi ngonekang pecak pararem krama Desa.

Palet 5

Indik Druwen Desa

Pawos 21

Padruwen Desa Adat Tunon, sakadi ring sor :

- a. Kahyangan Desa, lwire :
 1. Kahyangan Tiga
 2. Pura Beji
 3. Praja Pati
 4. Pura Panataran Dalem.
 5. Pura Melanting/Palinggih Ratu Bhagawan Panyarikan.
- b. Telajakan Pura
- c. Bale Wantilan/Banjar .
- d. Tanah Tegal.
- e. Karang ayahan Desa munjuk lungsur saking 119 (satus siangolas) karang (2015).
- f. Setra.
- g. Lelangunan, makadi tetabhan lan ilen-ilan, padruen Tempekan :
 1. Gong abarung soang-soang Tempekan.
 2. Gender wayang a perancak.

3. Ilen-ilan wali : Rejang, pendet lan sapanunggilannyane.
 4. Sasuunan marupa barong a siki, Rangda asiki.
- h. Muah padruen tiyosan.

Pawos 22

Piolihi-olihi Desa Adat Tunon, Iwire :

- a. Urunan sakeng krama Desa.
- b. Paica sakeng Guru Wisesa.
- c. Paica-paica tiyosan sane patut.
- d. Dana punia.
- e. Piolihi-olihi druhen Desa.
- f. Usaha Desa.

Pawos 23

1. Prajuru Desa wenang ngetengan pamupon laba pura lan sapanunggilan druhen Desa.
2. Pikolihi lan mamuponnyane kaanggen prabeya piodalan miwah pawangunan ring Pura.
3. Nyabran pasangkepan Desa, Prajuru pangemong druhen Desa nyobyahang pariindik munjuk lungsuring padruwen krama Desa.
4. Sakalwiring druhen Desa, patut wenten ilikitannyane.
5. Tan kalugra ngadol, nyandayang utawi ngesehang padruwen Desa, yan tan kasungkemin olih krama Desa.

Palet 6

Indik Sukerta Pamitegep

Kaping 1

Karang, Tegal lan Carik

Pawos 24

1. Karang ayahan wenten kalih soroh inggih punika :
 - a. Karang ayahan Desa, inggih punika karang ayahan sane kauwehin olih Desa Adat, kaanggen karang paumahan lan teba/tagtagan karang.
 - b. Karang ayahan guna kaya, inggih punika karang paumahan krama Adat sane kadruweang mabantang antuk numbas, ngedih utawi tetadtadan.

2. Krama sane ngemong karang ayahan, carik utawi tegalan patut ngawetesi karang inucap antuk tembok utawi pagehan, carik utawi tegalan inucap antuk pagehan utawi pundukan/pal beton. Wates karang sisih kaler lan kangin kapiara olih sang ngamong karang inucap, reh punika mawasta magelang kaluan. Carik utawi tegal sane kapiara watesane marep ka teben utawi manut dresta.
3. Yan wates inucap marupa pagehan tan dados langkungan ring 2 (kalih) meter tegehnyane.
4. Prade wares inucap ngalikadin, yanin pada arsa (anut pangunadikannya) kengin batese nganggen pinget kemaon.
5. Yanin wenten karang kabebeng utawi embet mangda kautsahayang pamarginia manut paigum lan pararem.

Pawos 25

1. Sinalih tunggil Krama Desa utawi Banjar miwah wong sane siosan sane magenah ring sawengkon Desa Adat Tunon tan kalugra :
 - a. Ngalalah tanah karang, palaba Pura, margi, tegal miwah carik.
 - b. Ngelalah linggih Kahyangan, tegak Setra, lan satunggilanipun.
 - c. Ngadol, nyilurang, ngadeang miwah ngangge wala karang ayahan Desa.
 - d. Ngarerehang sertifikat nadosang druwe ngraga utawi sapa sira ugi karang ayahan Desa wiadin tanah druwen Desa.
 - e. Ngembahang toya wit sakeng badan wewalungan, toyan kakus utawi toyan pasiraman, toya wit saking pawaregan miwah sane siosan ka pakarangan utawi ka paumahan anak siosan, kamargine wiadin ka tukade/tlabah sane kaanggen ring pawaregan, wiadin masiram utawi toyan wewalungan.
 - f. Ngutang limbah usaha, minakadi industri bengkel miwah sane siosan ka tukade/tlabah sakadi ring ajeng.
 - g. Ngentungang wangke wewalungan, leluhu lan leluhun barang pecah welah ka pakarangan krama siosan, ka tukade, ka margine, bilih-bilih ka genah sane kasuciang.
 - h. Ngutang luhu, luhun caru utawi sasajen siosan ring margi utawi pempatan, sang makutangan patut ngeseng utawi mendem luhune inucap sajeroning a rahina (1 x 24 jam).

- i. Mandusin motor lan sapanunggilannya ring margine, muah tan kalugra ngenahang rarampen wewangunan ring margine langkungan ring a rahina (1 x 24 jam).
 - j. Nyemuh pangangge, kekereng pantun, cacah muah sane siosan ring margi, ambal-ambal muah ring genah sane kasinanggeh suci.
2. Prade wenten palaksana krama Desane utawi wong siosan sakadi ring ajeng sang malaksana patut ngawaliang sakadi sane sampun, turmaning kakenain pamidanda manut pararem muah yanin nganinin genah sane kasinanggeh suci patut kadulurin pamarayascita manut sastra agama.
3. Yanin wenten sinalih tunggil krama Desa Adat sane ngemong karang ayahan Desa, wusan dados krama Desa, karang inucap patut kawaliang ka Desa Adat, tur olih Desa Adat dados kaicen krama sane siosan, mangda kaanggen karang paumahan tur ngayahang sakadi krama sane siosan.
4. Yanin krama Adat sane madruwe karang ayahan antuk guna kaya, wusan dados krama Desa, karang ipun manggeh kantun druwen krama inucap.

Kaping 2

Pepayonan

Pawos 26

1. Ngawit nandur papayonan tanem tuwuh, patut adepa agung (+- 2.5 m) ngajrowang sakeng wates, prade nyantos ngaliwat wates wenang kasepat gantungin.
2. Yaning wenten tetanduran ngungkulin samaliha mayanin ka pisaga patut kawara antuk paiguman ping ajeng, mangdane sang nruwenang wit ngrabah utawi notor.
3. Prade sampun kawara taler tan wenten usaha sang nruwenang wit, sang rumasa katetehan/kajerihan wenang masadok ring Prajuru Desa, tur risampun kaparitasan, kalugra ngicalan wit iucap, sakewanten patih papayogan utawi prabayannya patut ka tawur olih sang nruwenang wit.
4. Prade wenten krama bengkung manut angka 1 lan 3 ring ajeng, jantos ping tiga kasadokang ring Prajuru taler tan karebah, kadadosang taru inucap karebah olih sang nyadokang tur kapah tiga, a pah tiga ngeranjing ka Desa Adat, a pah tiga sane nruwenang, a pah tiga sane nyadokan.
5. Sang keni pamidanda panyangaskara sha prabeya manut pararem, arep ring wewangunan sang karubuhin, lwire :

- a. Sang nruwenang wit sinanggeh mayanin, prade pungkak ngrubuhin wewangunan krama siosan.
 - b. Sang notor, munggul utawi ngrebah taru tur ngrubuhin krama siosan.
6. Krama Desa Patut ngemanggehang ngawerdiang tanem tuwuh, sane ngawinang Desane asri.

Kaping 3

Wewangunan

Pawos 27

1. Nyabran ngawangun patut :
 - a. Masadok ring Prajuru Desa, bilih-bilih prade wewangunan nganinin wates.
 - b. Ngangge sukat, Asta Bhumi miwah gagulak Asta Kosala Kosali, sanistannyane manut ring patitis niskala.
 - c. Tan nyayubin kapisaga.
2. Prade ngewangun ring tepin wates patut ngawentenang paigum ring panyandingnya tur kasadokang ring Prajuru maka saksinnya.
3. Wewangunan ring tepin wates mangde wenten paembang sanistannyane tigang tampak lan angandang sakeng lantang wates.
4. Prade wewangunan nyantos nyayubin, bilih-bilih temboke ring telengin wates, ri sampun kawara tur kasadokang ring Prajuru, wenang kadanda manut pararem saha tembok inucap kagubar utawi kakaryanin abangan mangdenin toyan cap-capanne tan kapisaga.
5. Yanin wewangunan ring tepir, wates kahyangan jagat mangda wenten paembang sanistannyane a depa agung (2,5 meter), sajawanin wenten wates margi utawi rurung tur tan kalugra ngenahang wewangun sane kaangge ngalaksanayang karya sane kabawos romon.
6. Yanin wenten jagi ngawangun wangunan masusun tan kalugra nyayubin Parhayangan panyandingnya utawi Parhayangan jagat bilih-bilih ngenahang genah KM/WC wiadin majemuhan busana ring baduur.

Kaping 4

Wewalungan

Pawos 28

1. Sahanan warga Desa sane mamiara wewalungan, patut sayaga nitenin negul/ngalogor, mangda tan ngarusak karang utawi pabiana krama tiyosan, bilih-bilih jantos ngranjing ngaletehin Kahyangan utawi genah sane kasuciang.
2. Prade wenten wewalungan malumbar utawi ngeleb, ngarusak pakarangan wiadin pabiana krama tiyos, risampun kawara dados kataban tur kadanda manut pararem, lan ngawaliang wit sane karusak saha nawur panebas papiaran tetaban, manut panglokika Prajuru Desa.
3. Prade jantos ngaletehin linggih suci, minakadi sanggah/pamrajan lan sapanunggilannya, risampun kaparitas olih Prajuru Desa, wenang sang nruwenang kadanda manut pararem, tur mabuhu agung, tebasan prayascita lan tebasan durmangala. Prade jantos ngaletehin Kahyangan utawi Pamaksan, patut macaru panca sata, lan iwak itik belang kalung.
4. Krama Desa patut nyanggra wewalungan miwah sarwa prani, tan kapatut ngamademang paksi utawi nuba ulam, miwah sane tiyosan. Yan mamurug keni pamidanda manut pararem, tur sang malaksana patut kaaturang ring Guru Wisesa.

Kaping 5

Bhaya

Pawos 29

1. Pari indik bhaya, lwire : Jiwa bhaya, artha bhaya, dura cara ring agama.
2. Sang ngamanggihin kahanan jiwa bhaya, patut nepak kulkul bulus, mapitulung manut pawos 16 nomer 2 aksara b1.
3. Prade ring Desa kahanan jiwa bhaya, patut Desane ngaturang bhuta yadnya, sang mayanin keni pamidanda manut pararem, saha kaaturang ring sang ngawa wenang.
4. Prade wenten jatma mamisuh utawi nguman-uman jatma tiosan (mawit saking biuta), kakenian beya pecamil, tebasan prayascita manut pararem.
5. Prade wenten jatma ngawetuang biuta, mamisuh ring genah suci patut kadanda lan pamrayascita manut perarem.

Pawos 30

1. Sang ngamanggihin kahanan artha bhaya (kamalingan) patut ngulkul, mapitulung manut pawos 16 nomer 2 aksara b1, utawi sang kamalingan atur supeksa ring Prajuru Desa sane pacang nimbangin utawi nanda manut pararem, saha mawuwuh panyangaskara, prade wenten jatma ngamaling barang sinaggeh suci, tur sang malaksana inucap kaaturang ring sang Ngawa Wenang.
2. Patingkahe mapailon ring dusta kabawos sasuron, prade wenten jatma ngemanggihin maling tan nyadokang ring Prajuru Desa, jantos jatma tiyos nyaduang patut kadanda kadi dandaning maling, sakweh pangargan wit nikel ping lima, tur yan prade jantos ping tiga malaksana asapunika, wenang kasukserahan ring sang Ngawa Wenang.
3. Prade wenten jatma ngarereh reramon, minakadi daun kalapa, ron miwah sane tiyosan, tan pasadok ring sang sane nruwenang wit, prade kacunduk (katara) patut kadanda kadi dandaning maling.
4. Prade wenten jatma ngranjing kapakubon wiadin pakarangan jatma tiyosan rikala suwung, mawastu sang madruwe karang kaicalan, wenang jatma inucap katuwekan antuk madewa saksi ring Pura Bale Agung.
5. Mangda ttan katuwekan manut sakadi ring ajeng, asing-asing ngaranjingin pakubon jatma tiyosan, patut :
 - a. Matengeran swara (makaukan)
 - b. Nyantos sang nruwenang karang rauh utawi masadok ring pangapit pinih tampek maka buatan pangranjinge.
 - c. Pamedalnyane kadangingin sawen.

Kaping 6

Panyanggran Banjar

Pawos 31

Krama Desa rikala ngawentenang karya suka duka, patut kasangga olih Banjar , lwire :

1. Prade ngawangun Pitra Yadnya, Dewa Yadnya, miwah yadnya sane tiyosan, manut pinunas sang meyadnya.
2. Sahanan krama rikala ngawangun yadnya utawi karya suka duka kengin nunas penyanggran Banjar malarapan atur supeksa ring Prajuru Desa manut ageng alit pakaryane.

3. Pangrombo utawi karya gotong royong krama jantos ping tiga, langkungan ring punika patut katurunan pangu.
4. Pangung rikala Pitra Yadnya manut abot dangan yadnya, prade saking semengan nyantos wengi katuran pangung ping kalih.
5. Pakaryan gotong-royong patut katedunin olih krama sinamian rauhing pangampel.

**SARGA IV
SUKERTA TATA AGAMA
PALET 1
INDIK DEWA YADNYA**

Pawos 32

1. Palinggih panyiwian Desa Adat Tunon, lwire :
 - a. Kahyangan Tiga : Pura Desa/Bale Agung, Pura Puseh lan Pra Dalem/Prajapati.
 - b. Pura Penataran Dalem.
 - c. Pura Beji.
 - d. Pura Pajenengan Sang Hyang Bhagawan Panyarikan.
 - e. Pura Taman Sari.
 - f. Pura Bun
2. Rahina Piodalan Pura inucap ring ajeng, sakadi ring sor :
 - a1. Pura Desa/Bale Agung, ring rahina Buda Kliwon, Wuku Pahang.
 - a2. Pura Puseh, ring rahina Buda Wage, Wuku Merakih.
 - a3. Pura Dalem /Prajapati, ring rahina Anggara Kliwon, Wuku Tambir.
 - b. Pura Penataran Dalem, ring rahina Buda Umanis, Wuku Prangbakat.
 - c. Pura Beji, soang-soang sinarengan rikanjekan rahina piodalan ring Pura Desa, Puseh lan Dalem.
 - d. Pura Pajenengan Sanghyang Bhagawan Panyarikan, ring rahina Saniscara Kliwon, Wuku Wariga.
 - e. Pura Taman Sari, ring rahina Anggara Kliwon, Wuku Prangbakat.
 - f. Pura Bun, ring rahina Buda Wage, Wuku Langkir.
3. Pangaci ring pura inucap manut kecap sastra agama, saha kalaksanayang nista, madia, utama nganut kawentenan lan pararem.
4. Pangempon soang-soang Pura manut dresta kadi ring sor :
 - a. Pura Desa/Bale Agung lan Pura Puseh, kaempon olih Tempekan Baleran, tur dados kagilir manut pararem.

- b. Pura Dalem/Prajapati lan Pura Penataran Dalem, kaempon olih Tempekan Badlodon, tur dados kagilir manut pararem.
- c. Pura Pajenengan Sanghyang Bhagawan Panyarikan, kaempon olih tempekan Baleran lan Badlodon magilir nyabran nganem sasih.
- d. Pura Taman Sari, kaempon antuk Tempekan Badlodon.
- e. Pura Bun, kaempon olih krama pemaksan Pura Bun.

Pawos 33

1. Ring soang-soang Pura inucap patut kaadegang Pamangku.
2. Ngadegang Pamangku manut dudonan :
 - a. Turunan utawi ngawaris.
 - b. Nyanjan utawi masebuang soang-soang mapiteges mapinunas ring Pura wiadin ka dura Desa utawi ring balian sonteng.
 - c. Kacatri (kagilih) olih krama Desa.
3. Tan kawenang kaanggen pamangku, lwire :
 - a. Cedangga : Peceng, perot, cungh, slp.
 - b. Sang sapa sira ugi sane tan kapatutang manut pararem.
 - c. Sungkan ila, buduh wiadin edan.
 - d. Sane tan madruwe kasucian urip (naening ngalaksanayang sadtatayi)
4. Prabeya Kapamangkuan :
 - a. Adiksa Widhi, kamedalin saha kalaksanayang olih sang ngadegang, makadi krama Desa.
 - b. Mapitra yadnya riwekas, patut kasungkemin olih krama Desa, sanistane Brahma prayascita, prade yadnyane kalaksanayang olih warga sira Mangku, panyanggane manut peparem.
5. Pamangku Patut ngamanggehang sasaning Pamangku, lwire :
 - a. Ambek dharma sadhu.
 - b. Asewake dharma, makdang sastra utama.
 - c. Tan parek ring naya dusta.
 - d. Tan atayub ring tarub camara yudha.
 - e. Tan manjing ring umah wong wanajiwa karma.
 - f. Tan manjing ring umah wong drati karma.
 - g. Tan pati pikul-pikulan.
 - h. Tan pati salah suluh.

- i. Tan anginum asing ngawe mada.
- j. Tan wenang ajejuden.
- k. Tan wenang anayub toyaning cor, yan mawiadi terkewenang adewa saksi.
- l. Tan griganing wong akweh.
- m. Tan keneng cuntakaning wong len, sajawanin :
 - m1) Paguruan : 3 (tigang) rahina.
 - m2) Manatah asiki : 5 (limang) rahina.

Pawos 34

Swadharmaning Pamangku, lwire :

- 1. Ngenterang upakara ring kahyangan utawi ring soang-soang pakubon krama.
- 2. Prade salah sinunggil Pamangku kapialang utawi cuntaka, dados ngaturin Pamangku tiyosan utawi nuhur Sang Sulinggih.
- 3. Samaliha yan sampun Pamangku ngayah ring pura, kancit wenten kulawarganyane seda, Pamangku inucap tan keneng kacuntakaan, sakawenten Pamangku tan budal selami piodalan.

Pawos 35

Patyas utawi olih-olihan Pamangku, lwire :

- 1. Sarin canang soang-soang pakubon krama Desa.
- 2. Sarin canang rikala piodalan, manut pararem.
- 3. Upon palaba, carik miwah tegal manut pararem.
- 4. Luput pakaryan lan rerampen/raramon miwah padagingan.
- 5. Patyas siosan manut pararem.

Pawos 36

- 1. Pamangku kagentosin, riantukan :
 - a. Seda.
 - b. Pinunas ngraga, manawi kageringan.
 - c. Kawusang olih krama Desa , dwaning malaksana tan patut.
- 2. Prade Pamangku kawusan sangkaning malaksana tan patut, keni pamindanda manut pararem, saha ngawaliang prabeya pawintenan pecak.

Pawos 37

Kasukertaan Kahyangan sakadi ring sor :

1. Tan kalugra ngaranjing ka Pura, lwire :
 - a. Sang katiban cuntaka manut pawos 14.
 - b. Makta sahanan barang sinanggeh ngaletihin.
 - c. Sato agung, sajawaning rikala mapada.
 - d. Mabusana tan manut kadi tata caraning ngaranjing ka Pura.
 - e. Sadereng polih wak-wakan/pituduh Prajuru.
2. Pratingkahe tan wenang ring Pura, lwire :
 - a. Masumpah (macoran), sajawaning pituduh Prajuru.
 - b. Makobetan, masenengan, makolem, dados asiki lanang wadon.
3. Sang mamurug kecap ring ajeng, keni pamidanda pamrayascita manut peparem.

Pawos 38

1. Yan wenten jatma karawuhan ring Pura dados kapintonin, prade rumasa kasumangsayan, yan tan wyakti, jatma inucap kasisipang manut pararem.
2. Prade khayangan kahanan durmangala, minakadi, keni bhaya, Pamangku utawi sang ngamanggihin, patut digelis nyadokang ring Prajuru, mangda marumang krama Desa tur ngaturang pamtayascita sepatutnyane.

Pawos 39

Siosan ring piodalan/tegak piodalan ring soang-soang kahyangan taler patut kamargiang Dewa Yadnya sakadi ring sor :

1. Maturang ring purnama, tilem, kajeng kliwon.
2. Nangluk merana, kadulurin macaru sasih kaenem.
3. Piodalan saraswati, banyupinaruh, lan buda kliwon pagerwesi.
4. Panyepian (manut pawos 49) lan siwaratri.

Upakara inucap kamargiang manut kecap sastra agama lan pararem.

Palet 2
Indik Rsi Yadnya

Pawos 40

1. Sang pacang madeg pandita utawi pinandita, minakadi balian sonteng, sahalwiring jagi ngenterang yadnya, patut masadok ring Prajuru Desa, utawi ring Parisadha Hindu Dharma Indonesia.
2. Prajuru Desa patut ngawas nitenin tur naweg ngalangin prade wenten kacihnna sasar ring daging sastra agama.
3. Prajuru Desa patut nyaksinin upacara inucap, saha nyobyahang ring paruman Desa tegap rawuhing wates kewenangannya ngenter yadnya.
4. Krama Desa patut ngaturang ayah sapamadeg miwah ring panglepas Sang Sulinggih riwekas, katuntun olih Prajuru Desa.
- 5.

Pawos 41

1. Sang sulinggih patut ngariyining muput ring wawidangan Desa Adat, wusan punka wawu dados muputang yadnya kajebar Desa tiyosan.
2. Krama Desa patut sareng ngawas nitenin, katuntun olih Prajuru Desa, mangda sahanan yadnya sane kawentenang kaicen pamuput olih pinandita utawi pandita manut kawenangannyane soang-soang.

Palet 3
Indik Pitra Yadnya

Pawos 42

Pamargin pitra yadnya madudonan sakadi ring sor :

1. Pangupakaran sang kalayu sekaran :
 - a. Antuk mendem utawi ngeseng, makacihna makingsan ring Ibu Perthiwi utawi ring Bhatara Brahma, salami nutupang prabeya.
 - b. Atiwa-tiwa (upakara pengabenan/palebong), manut pararem.
2. Upakara- upakara pitra yadnya, riwusan kaabenang ngraris pangiriman lan ngarorasin.

Swadharmaning lan tetagenan prade wenten sinalih tunggil krama Desa kalayu sekaran :

- a. Sang kaduhkitan, patut :
 1. Nyadokang ring Kelian Banjar saha nunas tatimbang ring kawentennyane.
 2. Ngaturin krama Banjar makarya eteh-ete.
- b. Krama Desa/Banjar
 1. Kelian Banjar maritatas pamargin sang kaduhkitan, napik pacang kapendem, makinsan riyin utawi ngalantur kaaben.
 2. Prade kapendem/makingsan ring geni, raris kawentenang kulkul pamitahu (manut pawos 16,2c) olih kelian Banjar utawi patajuh nyane.
 3. Panyanggan Banjar, salanturnyane :
 - 3.1 Soang-soang krama Banjar nedunin lan ngamedalang patus (rerampen), manut pararem.
 - 3.2 Ngrombo ngaryanin eteh-ete sawa kasrengin olih krama sane rawuh maaksian.
 - 3.3 Sami krama Banjar ngater kasetra jantos pamendeman/ngeseng puput.
- c. Tan dados ngalelet, langkungan ring sajroning 7 (pitung) rahina, sang kaduh kitan patut polih pagebagan, manut paetangan Prajuru Desa.
- d. Tan kalugra nginepang bangbang.
- e. Tan kalugra mendem/makingsan ring geni rikala semut sedulur, kala gotongan, was panganten, rerahinan gumi, nemoning piodalan Kahyangan Tiga/Pura Manca, pra wani, purnama, tilem, kajeng kliwon, pasah, soma manis taulu lan tegak rahinan sang kalayu sekaran.
- f. Prade wenten kalayu sekaran sajroning piodalan dados mendem tan pasadok/nyuarang kulkul (makingsan), sakewanten mangda mamargi rikala wengi, risampun wusang ngatrang wali, manut pituduh Prajuru.
- g. Prade wenten jatma seda sangkaning sungkan ila, patut kagaenang ring setra, malarapan upakara makingsan ring geni, abunyane kependem.
- h. Prade wenten jatma padem sangkaning salah pati, ulah pati, lan kapandungan, dados kaupakarain seda bener, sakewanten kariyinin antuk upakara panebasan alit ring genahnyane seda.
- i. Prade wenten anak istri seda kantun ngadut manik, patut kalaksanayang upakara mesadak riyin, wawu raris kapendem.

Kacuntakaan

1. Sane kasinanggeh cuntaka, sekadi ring sor :
 - a. Cuntaka antuk kalayu sekaran.
 - b. Cuntaka antuk ngrajaswala.
 - c. Cuntaka antuk ngembas putra.
 - d. Cuntaka antuk karuron.
 - e. Cuntaka antuk sungkan ila/buduh.
 - f. Cuntaka antuk pawiwahan.
 - g. Cuntaka antuk gamya gamana.
 - h. Cuntaka antuk salah timpal.
 - i. Cuntaka antuk yaning wenten anak istri mobot utawi ngembas putra, sadurunge kaupakarain pabyakaonan utawi pawidi widanan.
 - j. Cuntaka antuk mamitra ngalang.
 - k. Cuntaka antuk sad tatayi.
2. Sengker cuntaka manut kawentenannyane :
 - a. Kalayu sekaran, cuntakanyane kaanutang sekadi loka dresta, miwah sastra dresta, taler manut pararem.
 - b. Cuntaka ngrajaswala, 3 (tigang) rahina ngawit sakeng ngrajaswala utawi selaminyane ngrajaswala.
 - c. Ngembas putra, cuntakannyane : sane istri 42 (petang dasa kalih) rahina, ngawit saking putranyane embas, utawi jantos risampun kaupakarain makekambuhang tur maprayascita manut kecap sastra agama, sane lanang jantos putranyane kepus udel.
 - d. Karuron cuntakanya, sane istri 42 (petang dasa kalih) rahina tur sesampune matirta maprayascita, sane lanang 12 (roras) rahina utawi manut pararem.
 - e. Sungkan ila/buduh, cuntakanya manut ilikita saking sang ngawosang.
 - f. Pawiwahan, cuntakanya jantos sesampune kaupakarain pawidiwidinan.
 - g. Gamya gamana, cuntakanya jantos sesampune kapalasang/kasapihang tur kawentenang pamrayascita raga.
 - h. Salah timpal cuntakanya jantos sesampune kaupakarain manut sastra agama lam pamrayascita Desa.

- i. Anak istri mobot tan kawentenang upakara pabyakaonan/pawidiwidanan, cuntakanya ngantos kaupakarain.
 - j. Ngembas putra tan kawentenang upakara pabyakaonan/pawidiwidanan, putranya jantos wenten sane mameras kundul.
 - k. Mamitra ngalang, cuntakanya nyantos sesampune kawentenang pabyakalan.
 - l. Sad tatayi, cuntakanya ngantos sesampune maprayascita raga turmaning nenten dados ngamunggahang upakara padwijatian.
3. Ngembas putra buncing, cuntakanya sakadi ngembas putra biasa, sakewanten patut Desane ngawentenang pamrayascita jagat antuk pacaruan gumi suda/panca sata ring jaba pura Bale Agung, masengker rare punika mayusa 42 (petang dasa kalih) rahina.
 4. Cuntaka kalayu sekaran :
 - a. Kapendem utawi kageseng, cuntakanya :
 - a.1. Banjar , 3 (tigang) rahina riwusan mendem/ngeseng utawi sesampune polih pamrayascita (masapuh).
 - a.2. kulawarganyane sajeroning pekarangan, jantos 12 (roras) rahina.
 - a.3. kulawarga sane tiosan satunggal sembah (purusa), 7 (pitung) rahina.
 - b. Kaabenang, cuntakanya :
 - b.1. Banjar , ngawit sakeng ngendag nyantos mapegat.
 - b.2. Sang nyambut karya, ngawit sakeng nyambut padewasan nyantos riwusan yadnyannya (mapegat), kalanturang malih 3 (tigang) rahina.
 - b.3. Kulawargan sang nyambut karya, manut pararem.
 5. Prade wenten sinalih tunggil krama Banjar kacuntakaan (antuk kapendem utawi kaabenang) sakeng dura Desa. Cuntaka krama inucap manut pararem.
 6. Sane katiban cuntaka, lwire :
 - a. Kalayu sekaran :
 - a.1. Sang kalayu sekaran.
 - a.2. Kulawarganya.
 - a.3. BeBanjar an.
 - b. Ngrajaswala, sang sane ngrajaswala.
 - c. Ngembas putra, kulawarganya sane ngembas putra, lanang wiadin istri.
 - d. Karuron, kaluwarganya lanang wiadin istri.
 - e. Sungkan ila, buduh, sang kasungkan.
 - f. Pawiwahan, sang sane kaupacarain, lanang wiadin istri.
 - g. Gamy gamana, sang sane malaksana.

- h. Salah timpal, sang sane malaksana miwah Desa Adat.
 - i. Anak istri mobot nenten kawentenang upakara pabyakaonan, sang maraga istri.
 - j. Ngembas putra tan kawentenang upakara pabyakaonan/pawidiwidanan, sang ibu lan putranyane.
 - k. Mamitra ngalang, sang malaksana
Ngembas putra miwah putranya.
 - l. Sad tatayi, sang malaksana.
7. Tan keneng cuntaka, lwire :
- a. Sang sulinggih lan pamangku Khayangan Tiga, sajawaning kawentenan sakadi pawos 33 angka 5 aksara m.
 - b. Rikala piodalan, risampun ngalang sasih/ngalah tengah.

Pawos 45

- 1. Atiwa-tiwa (pangabenan) kalaksanayang antuk :
 - a. Sawa prateka.
 - b. Nyawa rsi.
 - c. Swasta.
- 2. Panamayan pangabenan, wenten kalih pawos, lwire :
 - a. Ngaben dadakan/bah bangun, manut pararem.
 - b. Ngaben ngamasa, manut pararem.
- 3. Dudonan pangabenan, ngawit saking ngagah (seda), ngeseng, pangiriman, jantos ngarorasin.

Pawos 46

- 1. Peputusan pangabenan, wenten kalih pawos, lwire :
 - a. Ngaben ngamasa : kelapa, gesing, klangсах, beras, akehnyane manut pararem.
 - b. Ngaben dadakan : peputusan lan akehnyane manut pararem.
- 2. Pangingune ring krama Banjar , satunggil matetampahan kramane katurin pengingu, manut pararem.

Palet 4
Indik Manusa Yadnya

Pawos 47

1. Manusa yadnya inggih punika, upakara-upakara dharmaning manusa ngawit saking patemoning kama bang kalawan kama petak sajroning garba, ngantos kalayu sekaran riwekasan.
2. Upakara sakadi ring ajeng, madudon sakadi ring sor :
 - a. Magedong-gedongan, duk pangrempinian ibiang.
 - b. Duk sang kama reka medal.
 - c. Kepus udel.
 - d. Roras rahina.
 - e. Tutug kambuhan (42) rahina.
 - f. Nigang sasih.
 - g. Pawetuan/odalan/ 6 (nem) sasih.
 - h. Tutug kelih (ngrajaswala wadone, ngembakin lanangne).
 - i. Matatah.
 - j. Pawiwahan.
 - k. Mawinten
3. Upakara-upacara inucap, nista, madya, utama, manut sastra agama lan dresta.

Palet 5
Indik Bhuta Yadnya

Pawos 48

1. Bhuta yadnya inggih punika, upakara-upacara byakala ring pratiwi miwah Kahyangan, sarwa prani saha upakara-upacara ring babhutan lan piranti-piranti.
2. Upakara pabyakala ring sarwa prani, lwire :
 - a. Ring sarwa tumuwuh rikala tumpek pengatag (Saniscara kliwon, wuku wariga)
 - b. Ring sarwa ingon-ingon, ring tumpek kandang (saniscara kliwon, wuku uye).
 - c. Ring piranti :
 - c.1. Wayang, ring Saniscara kliwon, wuku wayang.
 - c.2. Sarwa lelanguan ring Saniscara kliwon, wuku klurut.
 - c.3. Sarwa landep, ring Saniscara , wuku landep.

- c.4. Sarwa syandana, ring Saniscara kliwon, wuku kuningan.
- 3. Upakara pabyakala ring pratiwi-pratiwi Kahyangan lan babhutan kawastaning mecaru.
- 4. Pacaruan inucap ring ajeng, nista, madya, utama, manut wiguna sakadi ring sor :
 - a. Eka sata.
 - b. Panca sata.
 - c. Panca sanak.
 - d. Resi gana.
 - e. Tawur agung.
 - f. Panca kelud.
- 5. Sajroning sakadi ring ajeng, kawentenang upakara :
 - a. Majot-jotan utawi yadnya sesa, nyabran wusan ngrateng.
 - b. Masepuh-sepuh, rikala pacang ngawentenang wali ring pura.

Pawos 49

- 1. Nyabran ngawarsa rikalaning tilem kasanga, kawentenang tawur kasanga maka cihna pacang magpag rahina panyepian benjangne.
- 2. Brata penyepian patut kamargiang olih krama Desa :
 - a. Amati gni, tan dados maapi-apian.
 - b. Amati karya, tan dados nyambut karya.
 - c. Amati lelungan, tan dados melancaran.
 - d. Amati Lelanguan, tan dados maoneng-onengan, masuara gora.
- 3. Pabratan inucap kamargiang sakeng medal surya rauh medal surya benjangne.
- 4. Sang mamurug kecap ring ajeng, keni pamidanda manut pararem. Kamargiang olih patelik (pecalang Desa).
- 5. Riwus rahina nyepi, benjangne maka chna pangawit icaka warsa, patut warga Desane sami ngaksama (Darma Santi).
- 6. Pecaruan sasih manut dresta/agama : nemoning sasih kalima, kaenem, kapitu, kaulu, lan kasanga, sajawaning wenten durbiksan jagat.

SARGA V
SEKERTA TATA PAWONGAN
Palet 1
Indik Pawiwahan

Pawos 50

1. Pawiwahan inggih punika, patemoning purusa lawan pradana malarapan panunggalan kayun suka lla, kaduluring upasaksi sekala niskala.
2. Pelaksanaan pawiwahan, lwire :
 - a. Papadikan, kamanggala antuk pakrunayan.
 - b. Ngrorod, ngrangkat riyin, wawu kakrunayang.
 - c. Nyeburin utawi nyentana (risampun nganutin upakara pamrasan).
3. Pidabdab sang pacang mawiwaha, patut :
 - a. Sampun manggeh daha truna (nganutin Undang-undang Perkawinan).
 - b. Sangkaning pada lila (tan kapaksa).
 - c. Manut kecap sastra Agama.
 - d. Kasudiwadani, prade pangambile tiyos agama miwah kapati wangi (rng pawiwahannya).
4. Pamargin pawiwahane mangde nganutin undang-undang perkawinan sakeng Sang Ngawe Wenang.

Pawos 51

1. Pawiwahan sane kapatutang ring Desa, sekadi ring sor :
 - a. Sampun kamargiang pabyakala utawi paskapan, olih pinandita utawi pandita, kasaksiang sekala niskala.
 - b. Wenten pasaksi Prajuru sane mapakelingang utawi ngilikatayang pawiwahane.
 - c. Sampun matengaran swaran kulkul, manut pawos 16, angka 2 aksara b.1. kaping pat.
 - d. Pawiwahe inucap ring ajeng, sampun kalikitayang ring Sang Mawang Rat.
2. Parabian sane tan manut sakadi ring ajeng, sinanggeh tan patut.

Tata caraning parabian, patut sangkaning ring sor :

- a. Sapa sira ugi pacang ngawarangang, pakaluwarganya patut masadok ring Prajuru, selanturnyane Prajuru maritatas manut tan manut pamargin parabine.
- b. Pamargin papadikan, manut dudonan :
 1. Pakrunayan jantos ping tiga, saha soang-soang malaparan :
 - 1.1. Kapertama, antuk canang.
 - 1.2. Kaping kalih, antuk canang lan sirih sajangkep-nyane.
 - 1.3. Kaping tiga, taler antuk canang lan sirih sejangkepannyane, kabawos pamuput pamadikan.
 2. Risampune manut sekadi ring ajeng, raris sang istri kaantenan ngalantur kaajak budal ring pakubon sang lanang, saha kalanturang antuk, pabyakala.
 3. Mangda puput tumus sekala niskala raris kulawarga purusa makta pejati ring mrajan wadonne.
- c. Prade ngrorod/ngrangkat, patut :
 1. Reraman lanange ngawentenang panglukuan antuk duta sakirangnya 2 (kalih) diri.
 2. Pagenahan antene tan dados ring pakubon sang lanang, sadereng mabyakala.
- d. Sajroning pakrunayan/panglukune, patut :
 1. Kemanggala antuk geng pengampura arep ring reraman wadone.
 2. Kaigumang bawos idih pakidih utawi pategayan arep ring pasewakan ring sang ngidih, saha dewasa pakrab-kambeyane riwekas.
 3. Kacihneyang indik kapurusa utawi prade sentana rajeg kajejerang kapatut ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang sentana nyeburin (kadulurin Hak warisan).
 4. Prade tan terima pejati, pakrunayan kamargiang jantos ping tiga.
- e. Pakerab kambean mapiteges upakara tinas apadang (puput) mapakuren, dwaning manut sekadi ring sor :
 1. Sajroning kabawos ambe, kalaksanayang sakala niskala antuk sarane jejauman miwah pawidiwidanan :
 - 1.1. jejauman pinaka ngambe/ngadungang kayun soang-soang pakuluwargan wadone.
 - 1.2. Widiwidana pinaka pajati niskala nunas wadone ring pamrajan.

2. Sajroning bawos kerab, pamargian ring sekala :

- 2.1. Antuk pesaksi krama Banjar (kesade antuk Prajuru Desa).
- 2.2. Pameksa pasaksi Prajuru sane ngilikitayang.

Palet 2

Indik Nyapian

Pawos 53

1. Pawiwahan prasida kawusang, malarapan antuk palas parabian utawi kapademan.
2. Wusan mapikuren sinalih tunggil seda, mapiteges balu, makadi balu lanang utawi balu istri.
3. Palas parabian, wenten kalih pawos, inggih punika :
 - a. Sangkaning pada lila.
 - b. Sangkaning mawiwit wacara.
4. Sang ayat palas merabian patut atur supeka ring Prajuru, yaning olih Prajuru tan prasida antuke atep merabian malih, patut atur atur supeksa ring Guru Wisesa. Risampune pamutuse tinas apadang, wawu Prajuru nyobyahang kawentenanya ring Desa, saha mawicara keni pamelin suara kulkul, manur pararem.

Pawos 54

Tata palas perabian sangkaning pada lila , sekadi ring sor ;

- a. Nawur prabeya pasaksi sinalih tunggil pada matenga.
- b. Paguna kayan polih pahan pada.
- c. Prabekel tadtadan soang-soang kakwasa niri-niri, miwah warisan kakwasa olih purusa.
- d. Ngawruhin miwah ngupajiwen prati sentana, manut swadarmaning guru rupaka.
- e. Nawur pamidanda panebes swaran kulkul, manut pawos 53 angka (4), manut pararem.

Pawos 55

Prade riwekas sang palas marabian adung malih, patut :

- a. Ngalaksanayang malih upakara pawiwahan.
- b. Kadanda nikel sakeng palase, yadiastu palase, sangkaning pada lila.

Pawos 56

1. Sang balu kabiyang dados :
 - a. Balu luh wit sentana (sentana rajeg), miwah balu luh boya sentana rajeg.
 - b. Balu mwani kapurusan (wit sentana) , miwah balu mwani nyeburin boya sentana.
2. Swadharmaning balu inucap, patut :
 - a. Ngamanggehang pati brata, tan dados ngamargiang para dara/drati krama.
 - b. Ngwasayang waris paguna kaya, tan dados ngadol, ngadeyang, makidihang, lan siosan punika, sajawaning antuk paiguman sakeng pianak utawi kulawarga pinih tampek sakeng kurenanya, prade pianak kantun alit-alit.
 - c. Dados ngidih sentana prade wenten pidabdab sadurung sinalih tunggil padem, saha kaigumin olih kulawarga kaparusa.
 - d. Kawenangang mawiwaha malih, prada polih paigum kularwarga pinih tampek ring kurenannya.

Pawos 57

1. Balu kaucap tan pageh, sakadi ring sor :
 - a. Drati krama utawi para dara.
 - b. Matilar sakeng pakubon tan pasadok jantos 6 (nem) sasih.
 - c. Lempas ring swadharma siyosan, tan praside ngsesehin solah, maprewreti arep ring pituduh sane patut saking kulawarga purusa.
2. Prade wenten balu tan pasantana utawi tan madrue santana, pageh ring swadharmananyane tan wenang katundung, prade tan praside adung, sang balu inucap polih pahpahan pagunakayan.

Palet 3

Indik Sentana

Pawos 58

1. Sentana wenten kalih pawos inggih punika sane kaucap prati sentana miwah sentana paperasan.
2. Prati sentana inggih punika, sentana sane metu saking pawiwahane kapatut.
3. Prade pawiwahane tan ngawetuang sentana, dados ngidih sentana malarapan upa saksi sekala niskala sane kawastanin sentana peperasan.

4. Sentana rajeg inggih punika, prati sentana wadon (pradana) sane kamanggehang lanang (purusa), tur risampun ngalaksanayang pawiwahan kaceburin.
5. Sang sane dados kaarsayang sentana rajeg inucap sekadi angka lima (5), inggih punika:
 - a. Preti sentana tunggal utawi sinalih tunggil.
 - b. Sampun kamanggehang dados prati sentana lanang (purusa).
 - c. Kaupakarain pawiwahan kautamayang jatma sane maagama Hindu, utawi jatma sane maagama tiosan sane sampun ngalaksanayang pamarisuda raga (kasudi wadani).
 - d. Sane ngamanggehang sentana rajeg patut masadok ring Bendesa Adat, tur Bendesa Adat patut nyobyahang ring krama Adat.

Pawos 59

1. Ngadegan sentana patut nganutin dudonan maka cihna arta brana pemerasan, sane kasaksiang sekala niskala.
2. Sapa sira ugi krama pacang ngidih sentana patut masadok ring Bendesa, sanistannyane 3 (tigang) sasih sadereng pamerasan, tur nunas palikitan ring Sang Ngawa Wenang.
3. Bendesa Adat patut nyobyahang ring krama, tur sang sapa sira ugi rumasa tan lila, mangda nyadokang ring Bendesa masengker sakirangnya 2 wuku (14 rahina) sadereng pamerasan.
4. Prajuru Desa digelis mawosin saha ngicenin pamutus, nepek ring catur dresta miwah pararem.
5. Prade sulur pamerasan tan manut sakadi kecap ring ajeng Prajuru Desa wenang ngandeg sang makarya, saha ngicenin panuntun mangda kapuputan riin bebawose, sulur utawi wicarannyane.
6. Kailikitayang ring sang Ngawa Wenang.

Pawos 60

1. Paperasan sane kapatut ring Desa, risampun maka cihna :
 - a. Widiwidana pamerasan.
 - b. Kasaksinin olih Prajuru Desa sane makelingang utawi ngilikitayang.
 - c. Risampun madruwe akta pangangkatan sentana sakeng sang Ngawe Wenang.
 - d. Kasobyahang ring krama.
2. Sang patut kaperas angge sentana sekadi ring sor :
 - a. Jatma sane maagama Hindu.

- b. Papernahan nedunang sakeng sang mamera.
 - c. Kulawarga sakeng purusa, prade tan wenten dados sakeng wadon.
 - d. Kautamayang sakeng waris pancer kapurusa.
 - e. Sinalih tunggil mawiwit sakeng kulawarga tunggal pamrajan, paibon, dadya.
 - f. Prade tan wenten sakadi kecap ring ajeng wawu dados sakama-kama.
3. Dados ngangkat sentana langkungan ring adiri, lanang/wadon.

Palet 4

Indik Warisan

Pawos 61

1. Warisan inggih punika, tetamian arta brana, utang-piutang saha ayah-ayahan, ngupadi kasukertan sakala niskala saking kaluhurannya arep ring turunannya.
2. Kang sinanggeh warisan lwire :
 - a. Druwe tengah makadi karang ayahan Desa, kahyangan pusaka, miwah sapanunggil ipun.
 - b. Pamrajan.
 - c. Pagunakayan, tatadtadan (jiwa dana), hutang piutang.
3. Wawu dados kabawos warisan, prade wenten :
 - a. Sang mapiturun.
 - b. Katurunan (ahli waris).
 - c. Arta brana miwah tetagenan (ayah-ayahan) maka cihna warisan.

Pawos 62

1. Ahli waris lwire :
 - a. Prati sentana purusa.
 - b. Prati sentana pradana (sentana rejeg).
 - c. Sentana paperasan lanang/wadon.
2. Prade tan wenten sekadi ring ajeng sang sinanggeh ahli waris :
 - a. Turunan purusa pernah ngunggahang, rerama lanang, pekak, salantur ipun rerama, misan, mindon.
 - b. Turunan purusa pernah kasamping makadi kaponakan, misan mindon.

Pawos 63

Swadharmaning ahli waris, patut :

- a. Nrima saha ngwasyanag tatamian, pah-pahan sakeng kaluhurannya, makadi ngrempon pamrajan, pura, saha pangupakarannya miwah nylediinin ayah-ayahan pawaris.
- b. Ngabenang pawaris saha nglanturang upakara-upakara pitra yadnya.
- c. Nawurin utang-utang pawaris, manut panglokika lan bukti.

Pawos 64

Pangepahan warisan manut sakadi ring sor :

- a. Risampun kalaksanayang upakara pitra yadnya lan utang – utang pawaris buntas katawur.
- b. Para ahli waris polih pahan pada sakeng pagunakayan, sajawaning drue tengah kaamong olih ahli waris kang sinanggeh krama marep.
- c. Sinalih tunggil ahli waris tan polih pahan, prade :
 - c.1. Nilar kawitan lan sasaning agama.
 - c.2. Alpaka guru rupaka.
 - c.3. Sentana rajeg kesah mawiwaha utawi preti sentana nyeburin soang-soang kabawos ninggal kedaton.
- d. Boya ahli waris dados mupnin hasil, manut dudonan lwire :
 - d.1. Sentana luh selami dereng kesah mawiwaha utawi tan alpaka guru rupaka prade madrue pianak tan kaangkenin wantah paguna kayan sentana luh inucap.
 - d.2. Balu luh wiadin mwani nyeburin (soang-soang boya sentana).
 - d.3. Mulih daha utawi truna riantukan pawiwahane pecak kabaos ninggal kAdaton.
- e. Pawaris dados maweweh rikala maurip, pinaka jiwa dana, tatadtadan/bekel maka cihna paweweh tetep ring pianak sane kesah mawiwahan.

Pawos 65

1. Prade sajroning pakulawargan wenten ahli waris langkungan ring adiri, patut :
 - a. Kawentenang paigum indik padum waris inucap.
 - b. Prada tan prasida, katunasang tatimbang ring Prajuru Desa.

- c. Prade taler tan wenten cumpu ring panempas Prajuru Desa.
2. Prade karang inucap kaputungan, patut Prajuru Desa nibakang ring :
 - a. Sang sinanggeh ahli waris manut pawos 62 (2).
 - b. Sang dados kaanggen sentana manut pawos 60 (2), (3).
 - c. Prade taler tan wenten cumpu ring panepas Prajuru Desa, dados katunasang ring sang Rumawos.
3. Prade karang Desa jantos kapah/kasepih patut soang-soang nedunin makrama Desa marep.

SARGA VI WICARA LAN PAMIDANDA

Palet 1

Indik Wicara

Pawos 66

1. Sane wenang mawosin makadi mutusang wicara ring Desa, inggih punika Prajuru Desa.
2. Prade sang mawicara tan wenten cumpu ring pamutus Prajuru Desa dados nunasang wicara inucap ring sang rumawos.

Pawos 67

1. Sahanan wicara mawiwit kacorahan sakalwire , sinanggeh nungkasin daging awig-awig, pararem miwah pasuaran Desa/Banjar , Prajuru patut digelis mawosin tan jantos pasadok.
2. Sahanan tata laksana sane nungkasin daging awig-awig lan uger-uger sang ngawe wenang (Peraturan Pemerintah) patut digelis kasadokang lan kadanda manut pararem.
3. Sajaba wicara ring ajeng, patut nyantosang pasadok sang nunas bawos.
4. Panepas patut pastika nyantenang iwang kalawan patut, malarapan Tri Pramana (saksi, ilitika, lan bukti) miwah tan maren nepek ring Catur Dresta.

Palet 2

Indik Pamidanda

Pawos 68

1. Desa/Banjar wenang nibakang pamidanda ring warga Desa/Banjar sane sisip/iwang.

2. Paniwak inucap kalaksanayang olih Bendesa/Kelian Banjar .
3. Bacakan pamidanda, lwire :
 - a. Ayahan panukun kasisipan.
 - b. Danda arta.
 - c. Rarampangan.
 - d. Kanoroyang.
 - e. Panyanggaskara.
4. Pamidanda sane katiwakang, patut masor singgih manut kasisipannya.
5. Jinah utawi raja brana pamidanda, ngranjing dados druen Desa/Banjar .

Pawos 69

1. Krama sane langkungan ring 3 (tigang) peparuman nglantur tan nawur urunan, dadosan, lsp. Wenang kerampag.
2. Rerampagan ngangge tata cara sekadi ring sor :
 - a. Kalaksanayang olih Prajuru kasarengin olih krama tigang diri, pinaka saksi.
 - b. Sang karampag, sangkaning darsana ngaturan barang utawi nyawehin tamem tuwuh, akehnya manut ring hutangnyane.
 - c. Prajuru miteketang mangda barang sane karampag digelis katebus masenger 7 (pitung) rahina, ring 8 (kutus) rahinane prade tan katebus, barang inucap pacang kaadol.
 - d. Tan nganinin saklwirin barang sane patut linggilang manut agama utawi tan mademang pangupa jiwa sang karampag.

Pawos 70

1. Prade sang pacang karampag ngawara (ngalengin) pamargin inucap, mawastu tan nganutin awig-awig Desa, sang karampag wenang kanoroyang makrama.
2. Pamidanda inucap ring ajeng prasida buntas, risampun sang kakenain :
 - a. Nunas geng pengampura ring krama Desa, riantuk nguwak pasubaya (pararem) pecak.
 - b. Nawur pangargan panguak pasubaya duk pacang karampag, kadulurin prayascita panyapsap kaiwangan ring Desa.

SARGA VII
NGUWAH NGUWIHIN AWIG-AWIG

Pawos 71

1. Nguwah nguwihin awig-awig Desa Adat Puniki, kalaksanayang ring paparuman Desa Adat.
2. Awig-awig puniki kamargiang ngawit kasungkeming (kararemin).

Pawos 72

1. Sakalwiring sane wenten saderengnya, patut kaanutang ring sadaging awig-awig puniki.
2. Sakalwiring sane dereng kabawos sajroning awig-awig puniki, patut kalaksanayang manut tata cara sane sampun mamargi kadulurin antuk pararem-pararem.

SARGA VIII
PAMUPUT

Pawos 73

1. Awig-awig puniki kararemin duh rahina : Wraspati Umanis, wuku Ugu, pananggal kaping 4 (pat) Icaka 1917, tanggal 14 September 1995, ring paruman krama Desa, magenah ring Wantilan Desa Adat Tunon.
2. Awig-awig puniki kapasupatiang tur kasaksinin olih Bupati Kepala Daerah Tingkat II Gianyar duk rahina : Buda Kliwon, Uku Pahang, tanggal 31 Januari 1996, ring Pura Desa/Bale Agung Desa Adat Tunon.
3. Awig-awig puniki kalingga tanganin olih : Bendesa Adat, kasarengin olih Patajuh (Kelian Tempekan), saha kasaksinin antuk Kepala Dusun lan Kepala Desa sawidangan Desa.

antuk Kepala Dusun lan Kepala Dēsa sawidangan Dēsa.

(4) Lwir sang ngalingga tanganin :

a. Prajuru Dēsa Adat Tunon :


(Ir. A. G. Sugianthara, MS.).


2) Petajuh Tēpēk Balēran,


(I Wayan Mangkrisa).


3) Petajuh Tēpēk Badlodon,


(I Made Selēmogan).

4) Penyarikan,



(Ir. Nyoman Madia)

5) Juru Raksa,


(I Ketut Satra)

b. Prajuru Dines/Dēsa maka saksi :

1) Kepala Dusun Tunon,


(I Made Rukun)

2) Kepala Dēsa Singakerta,


(Dewa Nyoman Arta)

Camat Ubud,


(Drs. Ida Bagus Ngurah Gdē)
Pangkat : Penata.

MENGETAHUI DAN TELAH DICATATKAN

PADA TANGGAL : 8 NOPEMBER 1995

N O M O R : 15 TAHUN 1995

DUPATIR KEPLA DA... TINGKAT II GIANYAR


BUPATI GIANYAR
ESTOKORRA GUB. NUBI SURYAWAN, SH

